

# Xajon ra tsikínda jè Judas

## Kjoa ñihixo'ta

<sup>1</sup>An Judas ra chi'nda-la Jesucristo ma, ko nga 'ndsèe ma jè Jacobo, t'bindá-no jè xajon rakii, jìon ra 'ño tsjake-no Nainá ra Na'in 'mì-lá ra t'koá Jesucristo t'jíkínda-la nga xá inakjoá-no. <sup>2</sup>Tse kjo'himatakòn ko kjoa'nchán ko kjoatsjacha katasakó-isa-la inìma-no.

## Jña ra kj'íí 'sín tjín 'én ko kjoachjine ra bakón-ya

(2 Pedro 2:1-17)

<sup>3</sup>Jìon ndí 'ndsé ra 'ño matsjake-no, 'ño kjoatseé mejèn-na nga kindá-najìon xajon, ra a'ta 'tse kó'sín ngásòn isìko-ná Nainá nga tsachrjekàjin-ná kjo'hì'in; tanga 'ndì 'ndì, 'koáá 'sín machiya-na nga machjeén-ní nga ko'sín 'siáan, nga t'íbítsa'ba-najìon nga 'ño t'ixkan-tjìò jè kjoatéxoma ra ijye jngo kjá ko'sín ki'tsì-la naxìndá tsje-la Nainá nga ko'sín kòkjiín-la. <sup>4</sup>Nga tjín i'ka xitá ra ta kjoachijé 'jaha'sen-jin-najìon, ra xá 'koá 'sín tjínè-la skanda t'isá kjoatseé nga kjo'hì'in 'ki-la, nga 'koáá 'sín t'íchja xajon ra a'ta 'tse xitá kù. Xitá kù mì kù bexkón Nainá; jè kjonda ra tsjá kjoatjò Nainá, ta 'koáá 'sín síchjeén koni 'sín tjín kjoa'cho ra sasén-la ijo-la; ko bachrjengíí jè Jesucristo ra tjína ítjòn-ná ra ta jè tajngo batéxoma-ná.

## Kjohi'in ra 'se a'ta 'tse Nainá

<sup>5</sup>Tanga mején-na nga síkítsjen-yá-najìon, ni'sín takó ijye 'ya jìon; nga jè Na'in-ná 'kia nga ijye tsachrjekàjin ya naxìndá Egipto jña xitá Israel, isikjehesòn nga'tsì xitá ra mì kù kjo'kjiín-la ra a'ta 'tse. <sup>6</sup>Ko machjeén-ní nga katasijin-te-no koni 'sín nga kjomà'tin jña ìkjalì ra mì kù ko'sín nda

tsikitsajnajin xá ra jñà kjongatsja, nga kitsjin-takón-ní ya i'nde ñánda tsako-la; jè Nainá yaá tsikítsajna'ya ya ndayá jñò ya ñánda nga títsajna'ño skanda 'kia nga kijchò nichjin-la kjohi'in nga sindajín-la. <sup>7</sup>Koaá tì'sín kjomà'tin jè naxindá Sodoma kò jè naxindá Gomorra kò jñà naxindá ra ya tjítsajna'ta chraña-la, nga yaá jahíjin ijo-la kjoachijngi kò nga'tsi kjoa'cho ra mì ya chiba-la. 'Koaá ma-ni nga ta tse kjohi'in ki'tsì-la nga ngi jé ní'í ra níkjíá fi'tso ijyehesòn-ni, kò jngoó xkósòn tíjna-ná ra jién.

<sup>8</sup>Jñà xità ndiso kii, 'koaá tì'sín 'sín-te, nga síhitjasòn-la tsa mé nijná ra 'bì-la, 'koaá tì'sín sítjé ijo-la, bachrjengií kjotéxoma-la Nainá, kò chjajnoó-la jñà nga'ño ra mì kì tsijen-ni. <sup>9</sup>Skanda jè ìkjalì ra 'mì Miguel ra jè tíjna ítjòn, mì kì tsa 'én 'nga kiichjako jè xità-ní' 'kia iskajàn-ya-ni jè ijo-la Moisés; mì mé kjohi'in tsakánè-la; ta maá kitsò-la: “Jè Nainá katatsjá-li kjohi'in.” <sup>10</sup>Tanga jñà xità kii, taxkì chjajnoó-la kjoa ra skanda mí nda be-ni kó'sín tjín kjòn-ni; kò jñà kjoa ra machiya ítse-la, 'koaá 'sín síchjeén koni jñà cho ra jngó kjá mì kì machiya-la, ra tíjñà tsjá-la kjohi'in ijo-la.

<sup>11</sup>¡Ima-ró-ni jñà xità kii! Nga jè inchifitjìngi koni 'sín ki'sìn jè Caín. Kò ta ngatjì-la nga ton mejèn-la sìikijne, yaá inchikajin jñà kjoa'cho ra ki'sìn jè Balaam; 'koaá 'sín inchichija koni 'sín kjomà jè ra tsi'kìn Coré nga kondra kijì-la Nainá. <sup>12</sup>Jñà xità kii, jíón 'cho síkatsíjen-najìòn 'kia nga ya taña bakjèn-kò-najìòn, ya ñánda nga maxkóya; nda mí tsa masobà-la xità kii 'kia nga ya síngàsòn-kò-no; 'sín ta kó'sín matsja-la; mì tsa bexkón 'sí ra bíjna-la Na'ín-ná. Ta kjonda 'tseé ra bátsji jñà xità kii. 'Koaá 'sín jngoya-la koni jngo ifi ra mì tsa jtsí sí'ka-ni, ra jndí ra ján fiko tjo; kò koni jñà yá ra nímé to bajà-la kò nga tjon xka-la ra jò 'ka ijye mi'ken nga jngó kjá ngi tjánè kò kjama-la. <sup>13</sup>Jñà xità kii, 'koaá 'sín ngoya-te-la koni jñà xó-la ndáchikon ra 'ño kjí'nga, ra yaá bitjongi tsje kótjín kjoa'cho ra 'sín nga 'ya-la kjosabà-la; kò 'koaá 'sín ngoya-la koni nitse ra mì tsa ta jngo i'nde títsajna, ra kò'sín ijye tjínè-la nga ya kítsajnajin skanda ta mé nichjin-ni ya i'nde ñánda nga 'ño jñò chon.

<sup>14</sup>Jè xità ra tsi'kìn Enoc jè ra ijchò ito-ni tje-la ra ya inchrabà'ta-ni 'tse Adán, 'koaá 'sín kiichja ra a'ta 'tse xità kii nga kitsò: “Chítsijen-la Na'ín-ná, taxkì kjín jmi ma-ni ìkjalì-la ra tjiko nga nchrabá, <sup>15</sup>nga kiìndajín-la nga'tsì jñà xità

mé-ni nga tsjá-lá kjohi'in koni 'sín tjín jñà kjoa'cho ra ki'sin nga mì kì kijtsexkón jè Nainá, koni 'sín tsò jñà 'én táhijín ra kiichjajno-lá Nainá jñà xítá jé ra mì kì sísin Nainá.”<sup>16</sup> Jñà xítá kìi, ta kji'tá nichjin nga inchifajé kò nga inchichjajno, kò ta jñá mejèn-lá nga sakò-lá mé ra sasén-lá ra jñà. Ngi ta jñá síchjeén 'én ra nda síkítahijyo-ni ijo-lá; kò 'én sin, 'én nda chja, tanga ta kjonda 'tseé bátsji 'kia nga kò'sín 'sín.

### Kjoakixi ra sinè-lá xítá

<sup>17</sup>Tanga jìòn ndí 'ndsé ra 'ñó matsjake-no, nda tikítsjen koni 'sín tsò 'én ra ijye kò'sín tsikíjna chiya-no jñà xítá ra tsikíxáya-lá Jesucristo ra tjína ítjòn-ná, <sup>18</sup>nga kitsò-no: “Kia nga ijye mejèn fehe'ta jñà nichjin, 'seé xítá ra tà siitsja'tin-no kò ta kijnokeé ra kjoakixi, ra ta 'koaá 'sín siijchá ijo-lá koni 'sín tjín kjoa'cho ra sasén-lá nga mì kì tsa Nainá sísin.”<sup>19</sup> Jñà xítá kìi, ta xítáá síjòya. Ngi ta kjoa isà'ndeé tjíya sko, nga tsin-lá Inimá Tsje-lá Nainá.

<sup>20</sup>Tanga jìòn ndí 'ndsé ra 'ñó matsjake-no, 'ñó kixi tinchakoo jè kjoatsje-lá Nainá ra makjiín-no. Jè sabá Inimá Tsje-lá Nainá katasíchiya-no kó'sín nga kítsa'ba. <sup>21</sup>Ya títajna jìòn ki'ta kjoatsjacha-lá Nainá. Jchíña-la kjoahimatakòn-lá Jesucristo ra tjína ítjòn-ná, skanda nga tsjá-no kjobinachon ra mì fehe'ta.

<sup>22</sup>Jchahimatakòn jñà xítá ra jò tjín-lá ikon. <sup>23</sup>Kò tì'ndi tináchrjekàjìòn i'ka ni'í. Kò jchahimatakòn xítá ra i'ka, tanga tikindaá ijo-no ra a'ta 'tse jé ra tjín-lá; skanda machjeén-ní nga tináchrjengio kjoa'cho ra 'sín koni tsa nikje tjé.

### Jeya katijna Nainá

<sup>24</sup>Jè Nainá ra ma-lá síkinda-no nga mì kì tsjá'nde nga skajen-ngio, ra ma-lá kò'sín tsje kijchòko-no ya i'nde-lá ya ñándá nga 'ñó jeya chon nga 'ñó tjín kjotsja; <sup>25</sup>kò jè Nainá ra ta jè tajngo-ni ra ma-lá bachrjekàjin-ná kjohi'in ra a'ta 'tse Jesucristo ra tjína ítjòn-ná, kò'sín jeya kò 'nga katijna; katatéxoma, tì'koa kata'se-lá nga'ñó skanda tì'sa-ni kjoatseé, kò 'ndi-ni, kò skanda ta mé nichjin-ni. Kò'sín katama.